

Hafnarstjórn

Stjórnskipuleg staða

Hafnarstjórn heyrir beint undir bæjarstjórn. Hafnarstjóri starfar með stjórninni.

Eftirfarandi stofnanir starfa undir umsjón stjórnarinnar: Hafnir bæjarfélagsins, hafnarsvæði og hafnarvogir.

Skipan nefndarinnar

Í hafnarstjórn eiga sæti fimm fulltrúar sem bæjarstjórn kys til fjögurra ára að afloknum sveitarstjórnarkosningum skv. ákvæðum sveitarstjórnarlaga, hafnalaga og samþykktar um stjórn Ísafjarðarbæjar og fundarskóp bæjarstjórnar. Á sama hátt eru kjörnir fimm fulltrúar til vara.

Auk kjörinna fulltrúa eiga hafnarstjóri og bæjarstjóri rétt á að sitja fundi stjórnarinnar, með málfrelsi og tillögurétt.

Bæjarstjórn kys stjórninni formann og varaformann, en nefndin velur sér ritara á fyrsta fundi sínum innan eða utan eigin raða.

Hlutverk

Hlutverk hafnarstjórnar er:

- Að vera bæjarstjórn til ráðgjafar um hafnarmál
- Að gera tillögur til bæjarstjórnar um markmið í hafnarmálum sveitarfélagsins
- Að hafa eftirlit með því að samþykkt markmið bæjarstjórnar í þessum málaflokkum nái fram að ganga
- Að starfa með hafnarstjóra að þeim málum sem undir nefndina heyra
- Að gera tillögur um úrbætur í þeirri starfsemi sem undir nefndina heyrir

Hafnarstjórn gerir tillögur til bæjarstjórnar um fjárhagsáætlun vegna þeirra stofnana sem tilheyra verksviði nefndarinnar og í hafnarmálum almennt. Nefndin skal hafa faglega umsjón með rekstri þeirra stofnana og deilda sem undir hana heyra og hafa eftirlit með því að stofnanirnar starfi innan ramma laga og samþykktar fjárhagsáætlunar á hverjum tíma.

Meginhlutverk hafnarstjórnar er stefnumótun, en í minna mæli afgreiðsla einstakra mála. Hafnarstjórn setur forstöðumönnum og starfsmönnum þeirra stofnana sem undir stjórnina heyra starfsreglur um afgreiðslu samsvarandi mála.

Starfshættir

Um starfshætti nefnda er sérstaklega getið í VI. kafla samþykktar um stjórn Ísafjarðarbæjar og fundarsköp bæjarstjórnar og skal þeim fylgt eftir því sem við á.

Hafnarstjórn kemur saman fyrir luktum dyrum á fastákveðnum fundartíma að minnsta kosti einu sinni í mánuði. Skal stjórnin gera samþykkt um þennan fundartíma á sínum fyrsta fundi að höfðu samráði við bæjarstjóra. Hafnarstjórn heldur aukafundi eftir þörfum.

Stjórnin skal halda gerðabók. Kjörinn eða ráðinn ritari færir fundargerð í gerðabókina. Í henni skal skrá hvar og hvenær fundur er haldinn, hverjir sitji hann og hvenær honum lýkur. Skrá skal einstök mál sem tekin eru fyrir á fundinum, hvenær þau komu til, nöfn hlutaðeigandi, meginefni og afgreiðslu stjórnarinnar. Í lok fundar skal ritari lesa fundargerðina upp og allir viðstaddir undirrita hana. Fundargerðum kemur ritari stjórnarinnar til bæjarritara sem leggur hana fram með dagskrá næsta bæjarstjórnarfundar. Ritari sendir fundarmönnum afrit af fundargerð stjórnarinnar.

Formaður og/eða hafnarstjóri sér um boðun funda. Fundarboðun skal vera skrifleg og tilgreina skal fundarstað, tíma og dagskrá. Fundarboð skal sent fulltrúum og öðrum sem seturétt hafa á fundum eigi síðar en einum sólarhring fyrir fund.

Formaður stýrir fundum stjórnarinnar skv. ákvæðum VI. og III. kafla samþykktar um stjórn Ísafjarðarbæjar og fundarsköp bæjarstjórnar.

Fundur telst ályktunarhæfur ef meirihluti stjórnarinnar er mættur á fund. Í atkvæðagreiðslu ræður afl atkvæða. Mál telst fallið í atkvæðagreiðslu ef atkvæði falla að jöfnu með og á móti.

Eftirfylgni

Formaður og aðrir fulltrúar skulu snúa sér til bæjarstjóra með eftirfylgni staðfesta samþykkt stjórnarinnar.

Réttindi og skyldur fulltrúa

Um réttindi og skyldur fulltrúa gilda ákvæði sveitarstjórnarlaga og samþykktar um stjórn Ísafjarðarbæjar og fundarsköp bæjarstjórnar, eftir atvikum.

Fulltrúa er skylt að sækja fundi nema lögmæt forföll hamli. Skal hann boða staðgengil sinn og láta formann nefndarinnar vita um forföll með góðum fyrirvara.

Hver fulltrúi á rétt á að koma máli á dagskrá fundar, enda skilar hann efni þess til stjórnarformanns og/eða hafnarstjóra a.m.k. tveimur sólarhringum fyrir fund.

Fundarmenn skulu hafa hag bæjarins að leiðarljósi við störf sín en eru ekki bundnir af öðru en sannfæringu sinni, lögum og samþykktum um stjórn og fundarsköp Ísafjarðarbæjar í atkvæðagreiðslu um málefni á vegum stjórnarinnar.

Fundarmenn eru bundnir þagnarskyldu vegna mála sem þeir fá vitneskju um í starfi sínu fyrir stjórnina og ætla má að leynt eigi að fara skv. eðli máls eða lögum.

Fulltrúi skal víkja af fundi við umræður og afgreiðslu mála sem varða hann sjálfan, skyldmenni hans eða nánustu venslamenn svo mjög að ætla má að það móti viljaafstöðu hans að einhverju leyti. Honum er þó heimilt að gera stuttlega grein fyrir afstöðu sinni áður en hann víkur af fundi.

Lög og reglugerðir

Í störfum sínum skal stjórnin taka mið af þeim lögum og reglugerðum, sem undir starfssvið hennar heyrir og fylgja samþykkt um stjórn Ísafjarðarbæjar og fundarsköp bæjarstjórnar eins og þau eru hverju sinni og kynna sér ákvæði sveitarstjórnarlaga.

Þannig samþykkt í bæjarstjórn Ísafjarðarbæjar 25. október 2018